

四庫全書

集部

欽定四庫全書

彭惠安集卷三

明 彭韶 撰

記

同壽堂記

事出於天而有可必之幾一自然之理耳蓋事不可必而理可必人能致之則其幾在我所謂至樂而可欲者宜莫如壽遠遊之言曰毋滑爾魂兮彼將自然靜以待

之兮母為之先所謂理可必者如此凡遊宦海之士於
慾壑情竇械心機智孳孳焉日用之間而不知覺其勞
精役形甚矣自非高識遠韻不累外物將何以引年而
後凋哉余意山林之下必有悠然形骸之外吶口而弗
辨鈍鋒而弗銛灰心而弗熾全其貞而固其原然後其
底乎若吾邑封刑部主事沙堤黃公元安殆其人與公
為人慈祥和易不獨孝友得父母同氣之懽凡族黨姻
戚一處之坦率不識世所謂陷阱城府者因自號曰坦

齋嗜酒自樂沉冥世故人來就見語常事則答語榮利
輒觴之若不欲聞故蔽其平生人無問佞於彼彼無脩
怨於人焉長子榮先為浙江按察司僉事次子華今為
戶部員外郎科甲蟬聯一門貴顯公恬然若不知恩命
自天封錫薦至公退然若無有惟葛巾野服優游自適
於寂莫之濱足迹未嘗至公門人視之頽然猶里老匹
夫也配安人柯氏殿元竹巖學士先生之女兄與公同
德用能成公志俱為隣里人內外所慕每稱之曰斯翁

伉儷真難老哉蓋徵言其平素而取必於將來已而果然弘治辛亥公年屆古稀安人又加其一孟秋五日安人設帨之辰季秋二十二日公壽旦也時僉事致仕家居治具上壽鄉諸縉紳大夫相率稱慶彩衣錦服翟冠珠履交映一堂之上雙親具而二難並郡未嘗有也衆因名公所居堂曰同壽以志喜僉事乃貽書戶部求予為記予聞福唐義江之上有陳封君者夫婦偕老其家僉事憲副方伯內翰諸公繼其名德過者望其居第之

富想其人物之盛美為仙窟今觀公之家大較然也戶部宦業日著而公之第大節又擢行人司正姪輝繼舉鄉薦秩秩振振福履未艾世人豈不以神仙者流視公哉自是而躋上壽必然可致矣是為記

鐵漢樓記

賢人君子聳聲名於霄漢之上而能服乎當時信乎後世豈聲音笑貌所能為哉誠而已誠積而久則著而明凡同是心者孰不信且服哉不然無是心者也非人之

所能為者也宋至元祐好為多賢溫公在政府東坡在翰林元城諸人為從官可謂盛矣然當熙豐之後猶再實之木於是紹聖繼之奸相嗣虐羣賢盡斥元城劉先生始落寶文閣待制知南安軍道改提舉洪州玉隆觀本軍居住先生遂奉母夫人來寓寶界院又改少府少監未一年復徙嶺南瀕危數四初心不變東坡推服之曰真鐵漢也後雖召還終不能安於朝屢斥以死死二年宋有金難嗚呼此豈人所能為哉想一時君相非不

知先生之為賢然畏忌之以為阻吾為妨吾樂耳其心
固計曰天下全盛委裘可治何藉彼迂儒輩於是君自
聖而臣自賢馴致禍變不可救藥所謂樂者竟亦何有
而先生之道則昭然於後世矣南安舊祀先生於寓賢
祠而寶界未有聞成化戊戌東海張汝弼來為守暇考
圖志得之嘆曰先賢故居其可廢耶適院之右廊樓毀
撤而新之於時聶都山民獻梓木一章長九丈徑三尺
數百年前物也冥符期會衆咸驚異既以成是樓題曰

鐵漢蓋先生至是始有專祠使來請記噫韶何足以知先生然竊惟名世之賢其道有三曰合内外一患難齊死生蓋常變終始之極也志在責難已有愧辭是之謂欺先生忠孝正直言行一致未嘗有聲色貨利之好是用獻忠效職吾無忤焉内外不合乎持論從容臨難失措是之謂誕先生遇惇三貶官一再徙惡地遇京又連七謫曾無望焉患難有二乎死生危迫猶者或懼先生於豪判之來檻車之徵談笑處之生死不一視乎全具

斯道以立於世非至剛者不能東坡之言豈欺我哉抑
聞先生學於溫公公教之以誠且令自不妄語始退而
隱括七年而後可然則先生所立之卓其誠於中形於
外歟後之欲學先生者有所依據矣茲郡人士宜因太
守之表章學先生之所學他日登朝小用則師斯人大
用則下斯人

梅陰書室記

東湖何先生歸自淮庠傳家諸子而築室隙地以居室

之左右舊植梅數株既落實葉茂密可蔽赫曦祛煩歎
先生方積書室中席陰而讀之樂焉題為梅陰書室或
見之曰異哉先生之取於梅也當風雪載途草木搖落
之時而梅方牆角盛開暗香浮動高人韻士取焉吾見
其人矣又當綠暗紅稀果珍駢蕃之際而梅以江南佳
實薦鼎調羹宰臣弼士擬焉吾聞其語矣而未聞陰之
貴也先生曰予非黨異伐同但梅之花實夫人皆知愛
之而葉之蒙翳成陰丈人行輩既無所寓目官道傍置

又無所可口然而足以來清風消長夏間挾冊遊遨其間正襟危冠無浹背之勞手披口誦無睡魔之困皆是陰之為助況於他時德梅尤多子奚創見而異予哉先生乃述之致簡於韶曰願有記夫書室之名敬所聞命而規制尋丈家食時亦嘗過矚雖無書可也獨念積書之家經營甚苦而後人不能繼志遂一旦遺忘散失間有士夫存心不厚好竊人家古書或假借不還者衆矣若故宋富文方氏建樓聚書近世中門陳氏立廟置塾

極其一時之盛而今泯焉可慨也夫聞國初經籍難得前輩多手自抄誦今文治日廣板刻流布平生未見之書可求而得故有力與有志者多書於家然而誦習之功反不逮先輩遠甚況於後世子孫不身其勞其能體祖父之志守此菑畬於無窮乎徒足起人遐思太息而已斯室也先生歲集月積牙籤萬軸蓋不徒為自己種學之本固有望於嗣續之賢也異時來裔觀手植之梅讀手澤之書寧不惻然感憤而悠久是圖哉先生名涇

字思源淮安府學訓導歸田二十載海濱水涯日靜年
長故能務學之博而積書之富云

養思堂記

一樂難遇悲喜相半君子其何以為心哉惟各致所際
而已蓋父母之恩昊天罔極而人子欲養之心亦與之
無極不幸有一不逮則孺慕之情力致之勤未嘗敢一
日而忘予是以於養思之堂有感也堂為黃岩池生大
有所作生之尊翁某甫母某孺人同產四人六某大某

大謨一生也其季之生適某甫之沒之歲於今十有五
年矣生兄弟事母也致甘旨之奉備水陸之有於其邑
慨乃翁之不復作淒然有風木之悲於是以養思名其
堂所以寓存沒也生比歲來蜀省外父憲使高公子得
而識之既而將歸求記其所謂養思堂者予與之言曰
惡乎為思惟若考故先民有言大孝終慕豈其儼若端
坐如塑山下有風幹父之蠱善思令名惡懼怨惡菑而
播穫庶其終畝麥舟舉喪瀧岡表墓世濟其美有譽千

古惡乎為養惟母之將脩醴甘旨起居高堂豈其口體
志以為良新婦孝敬崔門用昌酒如成癖蔡母以傷養
志其樂德音孔揚否則列鼎人也弗臧不見負米於今
有先生避席曰敬聞命矣庶免其為彌文乎請書諸簡
是為記

重修陳先生祠堂記

天於人有大造焉人之心有大公焉士君子之用世其
獨無大有為之志乎蓋嘗觀之天畀斯人之才而必形

斯人之用或儉斯人之用而不能秘斯人之名天道人心於是乎見矣然形具用而有未究所以玉成於我也專儉具用而名不泯則人心之大公也著苟人心不公則萬古無聖賢豈復有知名之士而思所以祀之哉必祀之以垂厥世吾知人之果有定論而天之不負斯人也昔人謂名者造物之所忌此似是而非非善言天人也者也天之於人為善獲報自然之理豈於名而忌哉人惟以俊爽為高虛譽自重於是人心厭之始有不用用

有不美若天忌之然使以實才實德隨地效用則人心服於時聲名垂於後雖謂之天與可也何忌之有此子於湖口重修教諭陳先生之祠益驗之矣陳世家莆田先生為宋僕射靖之後國初陝西叅政觀之仲子屢更教職學業正心術明行義高潔文章古雅方教諭是學時薦不果用僅徵入館閣與脩永樂大典使之名益高而道益尊蓋天所厚者先生之學所與者師儒之職謂非形其用而大造於我不可也然先生之蘊則有非一

用所能盡矣其在湖也嘆學宮之卑陋憫斯文之不振於是捐俸買材勞身率工一起其廢而新之樂教不倦身化言傳使人材卒與大地齒此其興學成俗之功有可嘉者江廣戎卒數萬托以勤王散歸所至剽掠先生部督邑人障禦且諭告之得不為害遇民有利病輒於方面或監察官懇懇為言故多有踵門請問而後行此其保民恤物之功有可尚者謂非大有任而果於有為不可也先生嘗典閩廣文衡所取皆公論而親炙弟子

若殿元林環葦尤多名士故一時儒碩咸推重焉況其
清修之操老而彌厲楊文貞公稱其士行可質於鬼神
金文靖公謂其全名終始而無忝是以人心咸服罔間
士庶當時懷之後世仰之洪熙間先生去湖久歸老而
沒邑人相與塑像立祠於學歲時奉祀其後訓導天台
林純氏復振先生教規諸生愛焉成化四年祠壞邑人
修之併像林以配蓋以表沒世之思而答師造之恩也
豈非人心大公之明驗耶不然何其像設於老去之餘

而復重修於三紀之後哉應感之微誠非偶然者其有
係於綱常名教大矣先生之子淮聞祠既修走子往拜
數以書請記未及為邇自蜀入廣道九江慨先生之遺
風邈不可致乃謹述而記之先生諱賢字廷傑其秘閣
纂修與其他宦績非湖祠所係不復贅云

修復劉後村先生祠堂記

事有關乎表章而感奮人心必其出於自然之同而愛
憎無私焉自古名德之賢呼吸動世其在當時與名位

顯顯者抗衡交馳未見其甚異也百世之下顯顯者漸
盡無存人不復識而名賢君子獨歸然喬岳咸仰望之
為不可及此豈私愛憎哉誠出於公是公非之不可已
者卒然談道猶使人感動奮發况表章之而興復其祠
宇則繫於人心宜何如耶莆地褊小至宋始成郡而文
獻特盛忠惠文節正獻三五公為之冠冕最後後村劉
先生起而繼之文章流布事業兼備論者謂三五公而
下一人而已蓋劉自著作正字二先生師事文節公道

同行偕齊名乾淳間蔚然為文章家著作之子吏部侍郎與群從又皆以文學行義名世吏部之子則後村先生也資稟既異濡染亦深少時日誦萬言為文援筆立就壯而益學以至於成加以壽數之高位遇之顯遂以文事紹先聞宗天下嗚呼盛哉先生以陰入仕簿佐州縣已見惡於巨奸李知孝輩當世大儒真文忠公辟帥叅且以學貫古今文追騷雅薦於朝與祠未幾漸致從班輪對拳拳於茗州之獄邊釁之起雖忤執政亦結主

知於是乎有御札之褒特賜同進士出身出入館閣再
辭補郡猶為嵩之大全所不容晚召入乃薦歷工部尚
書以龍圖閣學士致仕年八十三而沒郡縣既祀先生
於鄉賢堂而門下士又即先生陳宅巷之故居塑像以
祠凡二劉之孫子皆居於是世有譜牒元以來頗敗落
獨正字之七世孫性成國初以材薦為南海令生文璧
二子長則從亦二子次為光敬幼孤譜為同姓所假久
而不歸光敬以貧故質故祠以居他姓而居外父歷經

龔琛氏家生子泰亦早孤既長游學教諭林道昭先生之門與言狀泰訴之府太守潘公舜絃追還舊譜而祠堂乏力以贖成化戊戌秋泰辟吏莆邑又訴之僉憲林公一中公素高風節作而言曰盛德之祠惡可廢諸亟命贖還泰泰既修飭復入居之一時學士大夫瞻謁祠下無不奮然欲為先生之為而又瞿然喜泰之善為人後也泰謀樹碑述以求予記噫僉憲有功於名教大矣某何敢辭憶自就外傳即誦知先生名好事者問言先

生盛時規取徐先輩園池有君今勝我今之夢蓋徐氏
故居鞠為茂草先生之卜葬焉非規取也不然先生為
政以崇風化肅紀綱訪故家禮名賢為先務豈於鄉先
進而違之哉先生志經濟尤善吏能而為文名所掩不
及盡用後遇似道當國貪收德望以慰人心乃位八座
豈蹈蔡氏用龜山之故智耶先生諱克莊字潛夫始居
後村人因稱為後村先生文集行海內不待頌美云

存有堂記


存有堂者宋樞密黃公五世孫文十九公之所建也黃在莆名族為一二數其先多顯人至樞密公出入兩府號宰執之家尤為鉅望初公在太學與陳宜中六人者極言丁大全之奸編管遠州大司成親率六館士送之當時翕然稱之曰六君子咸淳之際起遠外拜叅預元樞而沒不及節惠易名宋社屋矣生平天性寬仁有功在社稷有澤在生民有遺德在子孫承累世之盈有田數十頃荔園栢林合數頃以上有經史子集萬餘卷所

以篤祜以待後人者豈他姓所得而先哉傳子若孫至
曾孫仲四六公之世滋盛喜散財施棺屨以萬計是後
家指愈衆故居至不能容則析為三房文十九公仲也
慨先人之所有思負荷之維艱名子慶八慶十五諭之
曰先世之功烈盛矣非吾之所得為矣若其他而不知
存之則後而棄基矣吾何敢乃求故誠意伯劉伯溫先
生所書存有二字顏其所居之堂日督諸子相與讀其
書心其天先正舊物實賴以不墜焉百年以來世世寶

之成化五年春慶八公之孫解魁文琳慶十五公曾孫
貢士銓偕試春官以韶辱壻高門請為記嗚呼至哉言
乎不有有之何以肇其先不有存之何以固其後吾觀
諸莆若徐潭掄魁一盛於熙寧玉湖相業再顯於南渡
然迄後無聞人誠以祖宗有之而子孫不能存之者也
然則欲規世族之盛豈一人一朝之力哉昔者溫公有
三積之訓而歸重於陰德今觀黃氏大較然也產業未
嘗不厚積書未嘗不多然非所以為家壽方寸之仁祖

考飫之孫魯修之雲初又益繼之則雖欲不光大其門
其可得乎是以至於今日雖其輔君澤民之有未能如
祖宗之暢於事業然其德義詩書則固未嘗一日不存
矣此則遭乎天者有顯晦而非係乎己者有存否也後
人居此堂者尚思所以存之則迺休承芳豈不相尋於
無窮哉傳曰公侯之家必復其始行將見焉躬嘗升堂
竊窺世德之餘光故不辭而記之若潭潭樞府歷二百
餘年歸然猶存與夫孟

闕



彭惠安集卷三

欽定四庫全書

集部

彭惠安集卷

五四

詳校官庶吉士臣陳若霖

中書_臣劉源溥覆勘

總校官中書_臣朱鈐

校對官中書_臣李荃

謄錄監生_臣任楫文

欽定四庫全書

彭惠安集卷四

明 彭韶 撰

誌銘

明中議大夫山西左叅議致仕澹軒黃公誌銘
正統末韶入邵學獲見前輩風致及其時禮俗大槩老
成朴素遠浮薄恥言人過居室服用多因仍舊故婚姻
交際畧備儀文而已安識驕侈而以相訕相懟哉郡志

所謂俗幾鄒魯實於縉紳故老有賴焉時若會元陳公
舜用郡守方公庭訓鄭公季述及澹軒黃公四五人皆
朝野鉅望黃公於居室終身不挿一椽尤為舊俗繫重
奈不數年前輩淪謝素風漸微似聞後生耳濡目染去
儉入奢愛人以德君子每為之慨嘆若公遺行安可不
傳示於後人哉公諱常祖字邦經行文三先世居涵江
簪纓濟美為閩大族曾祖林元涵江書院山長祖佛不
仕始遷城西梅峰峰下父震號梅東又遷義井以公貴

贈奉直大夫工部員外郎妣蕭氏封宜人梅東公精易
學為莆士師公少習之始遊郡庠又從林三復顧在軒
二先生治尚書學復卒業殿元林綱齋之門脩詞知名
遠出流輩雅為莆守周公琰所器許遺詩梅東有衣錦
榮歸眼中見之句已而公應貢升太學生果舉永樂辛
卯京闈鄉薦明年壬辰馬鐸榜三甲第一人授行在刑
部廣東主事曹事繁劇因得練習滿三載陞員外郎彌
加詳慎嘗有進天書者五日不得報懼而自刎詔旨疑

有他寃鞠其居停婦將抵死公原實平反以免丁內憂服闋工部尚書吳公中董營建奏為其屬採木于山西湖廣時督促嚴急公為上為下悉心殫智事集有緒民頗得息肩有御史周姓者共事不法公糾罷之事竣秩且滿受誥命封贈父母援例省祭榮歸于家人思周守為知人既還用少師楊文敏公薦陞山西布政使司左叅議并晉地瘠民貧值歲凶多流亡公奏乞招徠聽免徭役三年悉復業平陽界上有盜聚千人為害公推誠

諭之不旬日皆降附正統十年滿六載致仕歸年方六十
三公形神清朗動止穩重性孝友母蕭宜人嘗病革
祈以身代而愈後數年母沒築墳于鳳凰山掘地三尺
許得甕器五銀牌一上刻使司字有署押蓋昔人所定
壽穴未及用而公得之教諭林魯瞻為福地記時公未
佐藩後果符署刻人以為孝感所致堂兄順美等沒無
嗣公為之殯葬嫁其孤女既老羣處里社未嘗以齒爵
自異是後行人方公源深等繼歸故里刑部員外郎劉

公此時尹莆邑請合會元諸老人會號曰耆英興守張
公瀾立坊以表之郡故事未有也憲廟登極公進階中
憲大夫優游城居二十餘載至成化紀元之明年丙戌
三月十九日卒享年八十有六配陳氏訓導質初之女
男子四長麒娶吳氏次麟娶方次龍娶陳次鳳娶吳麟
為郡廩生女四方江林觀葉茂高方遂其壻也茂高為
廣昌知縣孫男七開顏開基開明開敏開科開先開直
女六曾孫男女各一所著有澹軒稿藏于家祭酒羅先

生璟先為福建提學憲副聞公名配祀鄉賢祠中墓在
南山之麓與陳宜人合葬許恭人附許氏生麟廩生久
未有銘至是開顏舉鄉貢會試禮部乃奉國子監丞林
君大猷所述行狀請筆於予追憶往事實增感慨不復
辭為誌而銘之銘曰

俗幾鄒魯稱莆田由宋迄今何渺綿衣冠故老為率先
近時猶見黃澹軒孝感宅兆如牛眠高官屋不增一椽
耆英之會郡無前大耋興嗟閱重泉流俗漸降非昔年

特書遺行豐碑鐫典刑尚在可幹旋

儋州知州林公墓誌銘

莆城衣冠之藪布護仕途老而謝事者衆然年至耄耋可數也十數年中予所及見翰林學士贈禮部侍郎林公潮州通判方公尚矣繼而懷慶教授翁公樂昌教諭蕭公儋州太守林公皆年踰八十聲光相望蔚然為一時之壯奈未幾時二先生沒獨儋州公存爾弘治紀元八月十八日公亦沒於是鄉郡故老無八袞之叟矣士

林嗟惜明年己酉十二月日子瓊等合葬公暨元配宜人余氏于城南錦山之原先期馳事狀以銘誌為託予辱在姻戚不可辭公林姓諱慶字延珍別號雪菴世居城東稱著姓上世系閩自福唐尉攢公以來具見家譜四親以下世載隱德大父伯玉父雲潛母俞氏公幼敏知學年十五補郡庠弟子員進脩不倦正統甲子應貢為南京國子監生業成厯事吏部明習格令諳練時務景泰癸酉吏部合諸需次上舍生試之公在優等除瓊

州府儋州知州階奉訓大夫儋涉鯨波萬里之外民與
黎雜處氣習獷悍有符祖者據重貨任俠制持蠹衆甚
公因事除之一州稱快因相戒畏服自此無敢犯者乃
平賦役簡囚繫脩祀宇造橋梁又以餘力覲郡城通衢
九年之內凡有司之所當務盡厥心為之父老至刻石
頌其德政天順庚辰秩且滿公素嚴御屬惡黎官王賦
不與狎廉其不法數事奏治之賦反誣公遂遭逮公白
于京儋民亦群走乞留適遇肆赦錫致政歸公既休居

以家事任冢子以書香付叔季陶然事外惟以圖書自適退
老幾三十年人羨其福履之盛非苟然也卒年八十有六子
三長即瓊娶右族吳尚昭女次京邑庠生娶永豐知縣陳裕
女季芳娶江都教諭鄭啟善女女一適撫州府學訓導吳澄之
子誼孫七禎用和祿睦正安曾孫三長秀長厚長盛銘曰
郡守起家黃髮番番肩續以多其歸如之何鬱鬱錦里
寢邱安止埋詞弗侈厥聲無已

知永豐縣陳公墓誌銘

公諱裕字孟寬別號樗庵家世業儒高曾以上居城左
龍門至公之祖始遷鳬山勸耕嶺之東今為江口人諱
尚質考任漢川縣典史有善政諱乾妣吳氏雩都知縣
秀之女公天資穎慧志趣甚端性本剛急觸事輒發然
一畧湏如故不留宿於中博學多通而尤長於書自為
舉子業已汎濫經史貫穿百氏非如近世專門一經之
陋為文章有理致可咀嚙無枯寒腐爛之病於時聞人
故叅政黃公闕甚推許之為人善點檢慎交遊出入

取與皆闕

終始皆盡力經紀生得

其養死有所祀無復遺憾壯歲始入邑庠領成化乙酉鄉薦壬辰登進士第使河南親藩營葬事大小賜遺一切不受除知廣信府永豐縣縣居江右窮處民淳可化導公之治開心任真不設鈎距與民期某事當如何如何後無緩急守以必信而賞罰行焉久之民曉知公意而志自定公亦於鄉戶悉能記姓名并其物力遇輸賦重

輕差解遠近指掌配別人樂承受無有紛譁於庭者貧
極下戶措置儲峙稍資給之強梁賊蠹鋤其太甚他無
久繫之獄與慘毒之政訟牒不出境水旱不踰時故民
多饒足陳穀至連藁枯數十年積不以動餘物稱是奸
盜屏息學校益興上司行部至邑乃無一事可問境有
銀升發浙之羣不逞嘯聚攘奪民日夕憂生變公白當
道亟集戍兵嚴閉坑穴迄於今無事致仕都御史貴溪
高公上達每歎曰陳令一府六邑之最也他府有事常

奉檄徃莅晚邁沉疾作輟不定憲臣數薦治狀銓曹竟以疾不果用成化二十二年乙巳秋公滿九載歸莆展省先墓越三月疾革以十月十三日終于正寢上距宣德丙午十月二十八日生享年六十配孺人翁氏先卒繼孺人林氏生男信豐側室劉氏生男載豐女六長適知州林慶之子京次為予子濬次適進士黃文琳之子鈞俱翁出次許歸司訓王福臻之子璘二尚幼林出信豐等卜以某年某月葬公於某山之原走書與濬致浙

中以墓銘請嗚呼予自稚年獲友翁孺人之弟知恩平
縣時恭因內交於公且締姻好惟公溫粹之德宏敏之
學親之使人消非意而開茅塞非友乃師也奈予叨先
一第公顧晚達為山邑政成未召而大故及之豈非命
乎憶成化辛丑歲予偕公朝正而歸途次將別予曰晚
節難保知足不辱早退何如公曰此理到之言吾幸先
而子勿後也既而予抵廣明年調貴州又明年擢內臺
再引疾未允而公亦阻於當道不果退孤負初約異諧

他日孰知公遽止於是哉將何忍為銘雖然不可已也

銘曰

學古入官兼善為難非有之難弗實可歎膚末其學有
覲爾顏批政無良民用恫瘝公於斯文幼習以閑停涵
浸漬發泄汎濶司徒論秀陪列朝班出宰百里于彼山
間去其機牙示以肺肝解衣推食如已飢寒平刑定賦
去蠹斥奸行露無憂陳積如山嗟嗟樂只逸駕難攀載
馳鶚薦倦翼思還惜哉垂雲飛不盡翰一疾彌留事定

蓋棺浮榮謂何德譽孔多尚庇後人允世弗磨

林思承同知墓誌銘

公諱統字思承以字行別號靜齋姓林氏初林以九牧顯於唐其後衣冠不絕至國朝端州刺史蒞二十世孫環永樂丙戌舉進士第一人官翰林侍講於是林益以顯公殿元之弟子也歲行方復失其怙恃二弟一妹長者年七八少者甫離襁褓雖媵僕代勞不為無人然呱呱零丁情事難堪而公聰敏夙成已有成人風致故能

經理艱難家業賴以不墜迨授室念二親喪尚在淺土
亟與其室黃謀脫簪珥以襄大事且為諸弟妹婚嫁以
時世族稱焉有司選入邑庠公思紹美前人講讀銳甚
屢困場屋不以挫志而問學益老成景泰庚午舉福建
鄉試甲戌登進士第明年除知興州事州連歲荒歉乃
薄征勸分多方以處之蕪田千頃里胥徵賦如常民益
流徙公與同知陸嗣昌議奏得蠲其稅之半漳河數為
州患增築堤堰以禦之延袤百餘里重建義倉以廣蓄

積自是水旱不為患征徭糧草歲審量丁力之高下以
受役輕重事無不均人是以和選部郎中陳雲之弟佐
興屬邑毆殺民事覺公被委驗治或為祈免公歎曰以
人命媚人惡在為民父母卒正其罪民有婦寡奸豪奪
其居訴於公得直婦伺公他出袖二銀鍾以謝室人拒
之蓋習公身教舊矣一日脩學撤櫺星門治地得白金
二百兩有奇衆獻為公有公曰文明之祥神假手於吾
人也歸金主者以終學事他祀所亦次第新之成化乙

酉滿九載民詣闕乞留而代者已往不果從擢淮安府
管糧同知錫以誥命追贈父母淮轄二州九縣為東南
要會權勢往來未嘗少有餽遺以內交取譽維揚大侵
當道檄公往莅賑卹有方蠲免不濫上下賴之公久倦
宦途至是年將六十前後連以疾求退於巡撫都御史
及上封事皆不聽歲辛卯冬入賀萬壽節擬乞休致所
親謂之曰廿載進士兩考郡佐大可藩憲次不失府正
金紫之來匪朝伊夕胡不少湏邪公曰心苟知止視一

命為有餘若無紀極雖萬鍾猶不足吾知止矣違計其
他乎賀禮成懇疏乞致仕從之公天性孝友每念二親
不逮祿養先祠什物必極堅緻歲時忌薦必盡虔恭創
遠祖貢元公祠自高祖以下瑩域完脩如儀仲弟思纘
死無後公不利立嗣田宅使季弟思經之子繼之營已
壽藏於鳳凰山而備季同穴之制家庭之間白首無間
言馬家居垂二十年公事外不入官府晚益習靜惟與
縉紳故老結東山歲晏會以為樂鄉邦榮之弘治庚戌

六月二十日遘疾終于正寢距生永樂壬辰享年七十
有九曾祖奔興化縣學訓導祖應鳳殿元父也父珪泉
州府學訓導贈興州知州妣董氏贈宜人配即黃氏封
宜人前公十六年卒繼宜人鄭氏子男三茂榮早夭茂
春尚義官茂達邑庠生女一尚幼孫男三鋼銓銑茂春
等將以明年辛亥冬十月朔葬公先介從母之子給事
中林元甫狀事行來請銘予後公入仕宦途睽違無由
傾蓋祠部主事宋孔時數言公制行敦篤耄耋辭榮為

人所難宜述之以範世不謂茂春適以銘見屬其奚以辭嗟乎去古既遠士懷速化造請求薦勒停致仕蓋恒事也公處州郡無不足之色際成功踐知止之戒可謂廉退君子矣公之羣行雖多而難進之節卓乎可以警俗應銘銘曰

繫利達有定分兮貴仕止之得宜何世俗之躁進兮或違道以干之苟一得以自喜兮紛嘆老而嗟卑美若人之好脩兮不風靡而波隨懷瑾瑜以為美兮凜冰霜以

自持莅大郡於朔南兮藹令聞之交馳却金紫於跬步
兮回吾駕以逶迤垂八袞而觀化兮尚遺範之可師

明誥封恭人卓母朱氏墓誌銘

成化二十年春貴州按察使卓公純嘏年六十謝事歸
甫朱夫人已八袞公喜得美解以遂朝夕養既三年夫
人倏嬰風疾治而愈愈復作又踰年弗起壽八十有五
適予巡視兩浙公使人來訃且授以事狀速銘辭曰天
錫久縻官祿曠定省幸歸田娛侍膝下歲月無何罹此

大戚終天之痛曷有極耶孤哀子今無所用其情矣幽室之銘敢以為累予忝姻眷不得辭按狀夫人諱儀字閨則姓朱氏世居黃石琳井唐古田令璣郎中琰之後曾祖桓祖豫考允嘉俱不仕妣鄭氏夫人幼聰慧學書計通孝經論語大旨女紅精能長歸于卓封君叔興宋戶部尚書得慶六世孫也舅先沒姑陳氏在堂時家計稍落夫二妹未笄一弟尚幼夫人相夫極力營幹孝養孀姑甘旨無缺以時婚嫁弟妹皆得其懽心十餘年姑

沒乃合舅氏葬如儀其長子天錫少有雋才謀於家遣
入郡庠果領景泰癸酉鄉薦登甲戌甲科累顯官天順
間夫蒙推封為承德郎刑部主事成化初進中順大夫
常州知府夫人亦自安人加封恭人於是家慶具成高
堂齊壽稀年偕榮子孫衆多邑里咸嗟慕焉甲午秋封
君不幸既葬夫人傳家諸季而長子薦擢方面憲使更
任南北夫人年耄弗就養恒移祿以供甘旨夫人惟含
飴弄孫少長資遣受學以無忘所天之志病革謂諸子

曰吾生平無餘積產業無厚殖汝曹立券分給無間嫡庶喪具薄粥以充費慎無以珍物親吾膚吾瞑目無憾矣諸子泣而從之又四踰月而逝乃弘治元年九月二十三日距生永樂甲申三月十二日享年八十有五子男四長即按察使天錫次天鉞天銳天銘女二俱適士族孫男十一文澂文湑文沂文泮文浚文泗文溥文浩文汪文潭文演文澂文湑俱鄉貢進士孫女十二曾孫男五棐榮槩校采曾孫女一葬以弘治七年十二月壬

午日未時墓惟新里香山大流岸之原常州府君舊藏也嗟乎生膺顯封沒享高壽子位金紫孫聯科第福德可知矣銘曰

毓秀閨壺女德無虧嬪歸名門家室咸宜勤儉相夫植立扶持九熊教子顯親揚名命服屢錫高堂有耀孫曾繩繩實惟克肖桂籍聯登簪纓有繼大耋其嗟流慶後裔香山之原劍合于茲匪有厚載式著以辭

鄭教授墓誌銘

昔正統甲子予童年遊鄉校聞師言是科解魁黃公舉人鄭公林公柯公大為一時壯觀曰東南數舉所未有蓋大叅殿元與二郡博也於是未識而心識之迨將壯入仕始獲識焉四人者交莫逆而以文章氣節相高位不同名實同也柯黃早逝林鄭猶歸然存後鄭先生亦逝而鄉邦落寞矣予每為嗟惜茲先生之子徽來京述事狀請銘追惟風懷不可以不文辭按先生諱立字克豫號拙庵世居城東倉邊巷其遷徙派系具見從兄嘉

興府通判已墓志甫詩禮舊族也先生之考為信庵處士富而好禮邦人士賢之先生早承家庭之教沉潛穎敏善記過人號佳子弟長遊司訓翁公長僉憲劉公武之門翁公優於史學劉公長於經義先生從之皆得其所傳古今事多通知於尚書講究精微大有造詣故製文字語新理到名輩讓之他經諸子亦時搜覽方先輩解元珙期之甚重舉入莆邑庠遂繼擢鄉薦高等戊辰會試辭乙榜卒業太學又三年為景泰辛未禮闈擬正奏

三百五十人先生名在選中得旨留二百人先生移副
榜首列嘆曰命矣夫不復辭授易州學正易當寇變之
後學頽教弛先生白於巡撫都憲陳公泰命郡衛脩飾
廟學乃復舊觀先生日坐躬教與諸生共治經史四書
情同一家日有課月有程如是者數載文事勃興次科
癸酉京闈得雋者四人後累科益盛郎署諫垣多有居
之易數十年未有也歲丙子江西鄉試聘為同考官鑒
裁惟謹若謝大韶羅應魁二殿元皆是科所取治書士

也歸遭父信庵處士喪解官服闋改六安州學正教之
如易而成材亦衆成化乙酉滿九載銓試居首家宰王
忠肅公議擢藩府長史先生辭以母老難北就養乃陞
饒州府教授饒為江右文物地先生往往蒞葢不勞而教
行矣深為淮王禮重郡守至不以相吏湖藩聘考試官
有懷金請託者密俟驛舍既見嚴正懾懾而止未幾丁
內艱筮筮再期不出戶庭釋服將治行忽得足疾即乞
老焉養病數歲親朋過從談論不廢晚生因之私淑者

多壬寅四月六日卒於正寢距生永樂甲午十月五日
享年六十有九子男三長即徽鄉貢進士娶張次衡娶
黃御娶柯女二陳大同林叔重其壻也孫男八曰相曰
揖曰楸曰彬曰霖曰楨曰材曰希文御與相俱邑庠生
先生器宇俊整動止矜嚴取與不苟交遊以類加以學
問之充羣行之富主學南北並善舉職聲聞四馳故一
時士大夫識與不識莫不嘆其為名師儒云柯殿元少
相好既貴不改卒以女女御人謂能全交易州教條至

今人猶誦法從而配祀于文昌祠饒人亦有哀思之什
惜乎不大用而止此也微才如其志不安小成然則先
生之未發洩者不其大於後余重微請追為之銘墓在
鳳凰山之原葬以甲辰年十二月庚申日銘曰

人亦有言本碩末茂匪無明徵時有邂逅嗟若先生資
深德厚胡展不舒胡用不究儒壇以闕鼎食也後抱玉長
終竟獻莫售有奇其逢以須其胄

賜冠帶直庵處士林公墓誌銘

莆有諸林皆號冠冕之宗其居刺桐巷者稱忠義林氏
蓋宋宣靖炎興間有主客郎中冲之奉使死節從子刪
定官震霆兄弟俱仕不屈奸憯有聲信史傳之至穆陵
時霆曾孫光世顯融官至司農少卿子璧卿元賜號妙
明玄應道濟真人高門甲第歸然城中至今如故真人
三世生惟範號悠然翁翁生潛皇明陝西寧夏斷事公
之祖考考也妣陳氏繼妣田氏公諱赤字忠伯行慶一
號為直庵姿貌明秀長髯疏眉偉然世胄氣象人與之

接不覺歆祗斷事府君遠宦公治家政因不求仕痛母
不逮養遇異母弟崇伯友甚先世墳塋祠宇勤勤脩飭
產業皆護惜惟謹曰祖先所以肅後者也忍失之乎府
君謝事歸公奉養備至時迎鄉曲諸先達會聚為懽人
稱曰克家子性不嗜酒尤長幹蠱每執里役輒為郡縣
官所異待里中推為耆宿承受公事公起應之上下以
為能故閤老岳先生季方出守莆郡政號神明亦許公
為助我韶讀禮家居時鄉有水利事頗鉅先生命公董

之不踰旬月皆整辦費不斂而力不重勞鄉人目為長者以予之所見如此其所未見能一言既邪府君沒公亦年邁岳先生弔祭復命公從事如舊公謝焉治家樂善延師教子為世族增重年七十重客皆上壽黃內翰仲昭序以美之今上登極改元弘治公年八十承詔冠帶論者謂古皇極之世有錫福之夫其猶是歟四年庚戌七月二十四日得疾卒遯其生永樂己丑八月二十三日享年八十有三配徐氏宋殿元鐸之裔孫文球女

聰慧宜家先公四十年以景泰壬申卒年四十有五繼
吳氏先公十年卒年六十子男三長羽邑庠生次翹俱
徐出女七徐出者一適方吳出者二適陳適黃媵出者
四適楊適許適王適徐其庶長子翺與二媵亦先卒孫
男六曰敬曰欽曰文恂曰文博曰天相曰四明孫女五
曰世龍曰世鳳曰世榮曰世羅曾孫女二羽等卜以年
月日奉公與二母合窆于噍嶠山之原先期公之女適
黃者曰進士開顏會試禮部奉邑庠廖生預所述事狀

以墓誌為請韶辱公知舊矣可辭遂述而銘之銘曰

忠義之世衣冠之胄惟後之艱忽圯而仆林有主客奉
使以死刪定弟九大農父子濟美先後宋史有聞潭潭
故第至今猶存斷事承之式克荷負自公上視乃祖乃
父懷材隱處孝友在躬小試區里綽有祖風世德高年
嗟孰與儔詔賜冠服閭里優游孫曾穆穆復始有期歸
安茲邱銘以昭之

明封太淑人黃母林氏墓誌銘

封太淑人林氏系出莆邑景德里姑青望族女是為湖
廣左叅政誥贈大中大夫資治少尹黃公之妻和兄弟
四令子之母年七十九以弘治甲寅四月十四日卒是
歲十二月二十七日葬于常泰里景祥山夫塋之次仲
子翰林編脩穆先期具行狀來徵墓銘惟大中公優學
藻思遁才敏政威望冠一時天下所謂黃廷永者少失
怙恃孑孑自立淑人歸寧于家未振凡粗細事一皆以
勞自處內具甘旨外備交際咸周而罔缺公蓋未嘗知

有無得以專意於學後迨官南臺歷藩憲淑人皆從念
後姑宋太孺人年高且子姓衆則求納妾盧氏以事公
自歸養姑姑性峻急淑人曲意奉之候起居上食飲無
違節姑悅臨沒時伏枕三夏中侍藥滌穢無厭意姑常
祝言願汝子婦如吾婦是吾所以報也淑人間承公命
合從父弟購刺桐巷古第葺而徙居焉其居氣槩實甲
城中成化初公踰五十未及大用而沒千里之良方騰
踏忽遭一蹶淑人痛之戒諸子迎柩厚治喪禮已而伯

子和撫家政穆與叔季秩秀母廢學曰汝父人豪也齒
爵僅若是吾大懼善慶不白於天下汝曹不丕承先志
是汝父真死我未亡人為不母勉之念之諸子受命惟
謹和幹理整肅兄兄弟弟而家道成矣穆感友于既貴
積祿入為援例救荒有將仕郎之拜三弟皆勵志篤學
並舉科第穆官禁近得推典秩為廬陵縣教諭去載偕
歸為養方歸時翰苑儒僊賦榮壽圖詩以慶穆奉誥挾
圖至中秋上壽賀者充庭淑人大喜更覺嬰鑠衆喁喁

稱嘆以為甫世族未始有也至是患腳氣疾因以卒淑
人天性慈祥處事務厚見人無智解與饑寒者恒閔卹
之家人收佃租必戒以殺額無苛取曰此吾家外藏寄
之以待子孫不亦可乎於婢僕輩終身未嘗撻一人公
在官嚴甚淑人善以柔承之間過其用刑故公雖嚴臨
下而不毀傷始以夫貴封孺人後以子貴進今封考季
三母朱氏四子惟秀試禮部沒于京盧氏出也三女適
郡庠生方暉林翔龍西安縣教諭林典孫男十有六人

曰洪曰濡曰清曰濂曰溥曰海曰淙曰濤曰澤曰浩曰
汴曰濟曰玉藻曰沂曰蒲曰藩女八人君子謂太中公
施豐報嗇幸有淑人之賢垂老持家福澤貴顯於今為
盛公之道於是始大彰閨門之訓有明徵矣銘曰

姑得孝婦家有慈母夫受賢室啟大其武千里一蹶悼
夫中止留餘有慶取必於子昔人有言梓材既斲貴在
後人施之丹腹蘭桂叢芳簪組蟬聯仲也登瀛館閣稱
賢錦誥煌煌講臣是錫假寧有詔慈顏以懌忽其逝矣

金定已月
下從所天刻詞昭美垂千百年

周廷聚太守墓誌銘

百年來吾郡鄉試士獨正統丁卯陳冢宰一科登第最
衆猶宋劉著作之榜然明年戊辰廷對所得尤多魁傑
聲名之士內而保傳外而牧守森布天下人仰敬之若
故饒守周公廷聚其名下士之一也公美丰姿有才諳
曉暢世務初授戶部主事己巳之變郊有戎壘公提千
卒分主給餉犯難冒險能以智自全敵去監牧京儲景

泰初遣勞軍于西蜀歸復差通州等處饋收蜀莢公在京通出內嚴明宿蠹窒穴軍民德之天順改元英宗皇帝復位大行黜陟命吏部擇郎官御史有望實者為牧守得公等十有四人宣入便殿面諭以治道賞實楮賜宴而遣之凡此皆前所未有異數也公拜知温州府浙東之俗習尚華侈巨室好事關節以立聲勢吏胥缺輸貨于官以補之高下有價士情廢業累舉乏人面前馬走善設間符同規利囚繫以氣相勝積歲月不得出公

到官正已率下内外有截申嚴禮制暇日課士而辟吏
用所長事務叢沓一見輒有斬斫劑量得宜訟獄小大
刻期與決多不越三日五日諸為奸利相戒遁迹敝政
一切改紀焉郡地邊海珊江沙漲在處不清而稅不視
業民以病告公按量得實為更正之貧戶始復生意他
如學舍與梁之類屬有司當行者無不完繕郡以大治
屬邑父老咸嘆賢父母以為創見府學潘生濬以公直
其藏匿逆黨之寃繪象于家祠之廵按御史閻鼎上疏

旌公異政將再書考丁父封主事公憂服除改知饒州
府爬搔糾摘將以抑強扶弱而公性豪整廉隅外見不
能為齷齪細謹態巡視九卿簠簋不飭公恥之遂致官
政而歸成化六年庚寅秋也於是太夫人翁氏尚無恙
公樂養之暇構載德堂以奉晨昏寶書堂以榮誥勅傍
列勤友齋禮賓所博古軒以備文會燕遊之適閩藩叅政
陸公孟昭為立歸樂坊於其第十三年丁酉五月九日
以疾卒距其生永樂辛丑享年五十七翁夫人悼念之

再期亦卒公諱琰封主事公諱彥由祖考妣以上世諱
見考墓誌配歐氏封安人子男四長文郡庠生後詔賜
郎官娶俞次植仙遊醫學訓科娶陳次禮娶鄭次弼郡
庠生娶吳女二長適林次未行與禮俱先卒孫男四文
等既塋公于王倉福興岩之西原謀曰先人德業宜有
幽刻告于禮之外父翰林檢討廷綱以知州高昂所述
事狀走書請為銘公早從我先刑部府君遊學貴而視
我最恩乃不辭而以治郡銘曰

於赫英皇東濕御宇更賢牧民申以天語古重師帥史
紀循良善效而職世用平康公拜稽首往蒞于溫欽服
弗諉三載攸聞情業以從諧價以絕我敏而公吏民胥
悅豪奢踰制流風斯靡峻其隄防務俾率禮薄徵簡繁
視市如野片言裁決事無留者海濫陸沉亦有息壤荒
度定賦均其消長載開儒宮科目繼繼田餘粳稻水無
厲揭父老交嘆稀逢百年獲免黨禍留像祀焉御史飛
簡旌公治行氓之憂矣讀禮不幸滙澤劇郡起公治之

別靈擲垢公優為之乾沒可畏公致而還千里弗售方
臯所嘆期老慈侍而又不遐年斯位斯其命也耶

陳文耀方伯公墓誌銘

成化甲辰八月十六日江西右布政使陳公以疾卒于
官舍遺命其子璽曰張翰林同年交厚知吾深可求傳
我彭廵撫吾故友言不隱惡可傳信墓銘必委之於是
璽返柩於家乃奉張廷祥所為恥庵小傳使致請銘嗚
呼文耀之材之行海內推服世方仰其有為而竟然耶

予言何足以重公然辱治命不可辭勉受而叙之曰公諱
煒字文耀福州閩縣人先世衣冠文物著于閩之大義
具載考翰林侍讀綱齋先生墓誌綱齋元配林夫人無
子繼納林安人以宣德庚戌八月十七日生公資稟秀
朗聰悟過人甫十歲失怙力學年十八舉正統丁卯鄉
薦景泰甲戌會試登甲榜以疾未廷對奔嫡母喪歸嫡
母惟一女嫁已久公盡出母所遺衣物付之曰以慰吾
母於地下天順庚辰始赴對成進士例遣歸待次至臨

清覆舟溺子女止不行寓教山東御史劉魁輩皆出門
下未幾取回京明年選理刑又明年拜河南道監察御
史錦衣衛有都指揮自英廟時得幸連起大獄陷無辜
公與同官因更化之初疏其奸利謫戍嶺表中外快之
南京給事中王徽等劾內閣臣黨立廢后事調遠州公
請復其官以旌直臣不報尋差巡按蘇松常鎮四郡歲
連歉荒甚命有司發廩盈十萬以賑之諸衛漕卒遇造
舟預以月糧錢質于富室以充費而自無升斗之食公

為會其月日平其子本約歲可餘七月糧悉以還士卒
上海民婦與私夫逃其父慙謀殺丐女衣以婦女沉之
江月餘形變則誣婦翁因奸殺其女婦翁無以自明引
伏公疑令人蹤迹之果得之蕪湖巨室於是坐婦父以
死移北直隸提調學校公嚴章程勤課試而歸重名檢
學官被黜者餘三十人士子被汰者餘四千人復以生
員舊例充吏適中不學士子計特奏寢之成化庚寅陞
江西按察司副使福清商十三人見殺於石城民殺其

貲而燬其尸久不得主名公廉知為潘氏捕至伏法藩
司因盜越獄罪獄卒以故縱者二十七人公以一盜逃
而死典守者二十餘法太峻減論以徒甲午陞本司按
察使不事威刑而風稜自著上杭富商林春遣奴王氏
等歸家至番場湖同舟人夜拔十餘人于水而取其貨
王氏墮水不沒浮三十里得援出訴于公乃戒邏吏物
色之至撫州掩捕焉贓盡獲盜無一人免者臨川人陳
季宏搆民王華一為軍縣捕之急華一潛殺繼父白丈

質誣李宏因捕毆死獄數年不決公疑之詢知文質有
幼婦吳氏逮之至具得華一敘文質狀李宏得減死歲
嘗旱甚公禱而雨既而有芝產後堂柱衆以為瑞公曰
此歲豐人和之兆於我何有哉吏部連薦為浙江廣東
左布政使皆不得與而公又丁母安人憂去官既為闕
祠堂定祭禮立家規且躬霽心樓以淑子姪杜門不出
有終焉之志適江憲缺使吏部亟以公補之公不得已
至官持已愈嚴馭吏愈峻而治訟愈力吏民益畏愛之

朱子語類久不傳不憚勞費為梓行於世吏部復以湖廣左布政使薦又不與明年乃陞江西右布政使公不以正官自逸猶隨牒分守于外弋陽樂平二邑之境有溪介其間樂平民陂以溉田弋陽民輒潰之彼此鬭訟積不相能公躬履其地見陂可溉田萬餘畝而為弋陽惠纔二十而一遂屬一邑民諭之俾樂平民仍陂水行溉而倍償弋陽惠水之田并代其徭賦民皆樂從新昌民陳守訓者力貧耕讀為書良善之家四字旌焉蓋凡

賦政之餘有可以勸善懲惡興學下士者無所不用其
心其風操之厲不減於持憲日也兩廣總督都御史之
人廷議推公堪任雖俞音未下而士大夫咸色喜已有
濶江左布政使之擢而公不及見矣公為人志高行卓
所存所履一欲於正而不苟靜重整暇有澄不清撓不
濁器度義所激則勇為之至處人情周世務極其纖悉
能知人邪正咸區別云然考其人終身果然妙翰墨善
吟咏片言隻字為人寶惜聚書且萬卷手披口誦非有

事未嘗一日舍去為文章典重有體恬退之操尤所雅尚自為御史為藩憲正佐無一官不以親老乞休致為請疏或連歲上顧遭時貪賢尚能曾不少副公志而公於親沒後惟以退休為事然既不可得則繪深衣幅巾行樂圖題其上云念八閩之雲樹無限歸心貌七尺之骸軀聊存逸與其識趣之高尚悲慨可想也配林氏封安人側室王氏子男四長即壘娶臨川知縣姚志人之女次在次里次章並未成人女二長順適給事潘汝發之

子渙先卒次恭適戶部尚書黃鎬之子璽與順嫡出餘
皆王氏所生也十二月某日葬公于常思山之原銘曰
福唐大義衣冠之聚古靈同源為三侍御翰林貳憲兄
終弟及胡年不遐而名孔碩方伯嗣之弱冠高科為學
勵行古人則那弱顏固植有如處女見義必為則莫敢
禦諫官補外時宰私意九察一疏直臣增氣錦衣有臣
周來為

闕

瘠人以蘇按是南服發廩濟饑提

學

闕

江憲紛如陟副而正發奸示神罔不

鉤距斯得越獄誅首刑乃不慝義臣

闕

士式訛爾心罔逾憲度和氣蒸焉

闕

難進不售自初為官每懷棘

闕

不

逮于小恤宅既闋無意於世使者在門

闕

之制再

蒞江右聲績益揚長彼方岳將都憲綱祿秩伊何僅踰

二父壽考伊何既艾而五美奪之遽不老其成豈天於

世未欲治平身歸閩嶠名留海宇千載悠悠稽出此處

彭惠安集卷四

欽定四庫全書

彭惠安集卷五

明 彭韶 撰

碑銘

興化府重脩城隍廟碑

城隍廟何祀一郡所司保障之神蓋后土氏類也今凡
官寺皆立后土祠郡若邑皆建城隍廟其義一而已矣
人庇于神神倚於人人之所行不負幽明則默與神符

吉無不利自有德福之道焉苟藥自己作獲罪無禱則冥冥之中似主判者之我棄矣非為人敬慢而故施愛憎驚動以禍福也地方升降盛衰之機大約因人而致其類是夫興化府城隍歷代有碑國初因之號神為監察使民由之而不知蓋藉其威靈陰翊王化是猶神道設教之意也後止稱城隍之神詔頒示天下蓋正名定號以一民聽是乃敬事無諂之戒也廟有塑像見者肅恭先儒論山川之神難於像設則此城隍之像若亦可

疑嘗細評之今夫陰者為郭窪者為池四環而高深固
為城隍之象矣然人之仰畏不于其形而于其神既神
目之則必想其容儀思其動靜精神會聚靈感斯通切
意焄蒿悽愴中若有接於視聽之頃其神之昭著乎塑
繪從之而生殆所謂義起不得專以高深狀之矣神之
廟室創自洪武庚戌脩於宣德庚戌堅久壯觀惟抱廳
未備月臺未闢及門制卑陋廊廡淺隘前政未之有
改每當舉祭或遇霖潦內外湫逼吏長苟且其事神罔

顧歆郡以不寧弘治二年冬郡守丁侯鳳儀朝正于京
同知府事仁和朱侯士客新視篆謁廟惕然自計曰神
明所宅過陋失中匪儉祇辱府雖貧不可不先治是然
亦不可歛怨于下乃積罰贖之入節公用之出矢心弗
他久而益虔買石市材鳩工命徒以來歲庚戌春興事
蓋廟始建至是恰十周星矣理數環復衆為嘆異適黃
巖王侯存敬代為守饒平翁侯存道補郡推相與從史
之踰年落成殿廳前增抱五間兩傍增二間皆形加捲

蓬如闕月臺為尋者二東西廡舊十間今南北各增間
一後增架一前中各建一蓬室角道橫其前綿亘上下
外為大門增舊為三甍牆兩端如眉中為次門循舊為
三而增建屋六間左右連甍屬于兩廡丹楹藻枕曲欄
堅礎凡几案器皿之屬一新如儀周阿峻整寬可容衆
幽可避氛遠望即觀稱神居也當祀時守佐率屬行禮
政平人和神心悅懌屢降休徵于今四載歲獲豐稔家
用平康予歸休見之喜中書舍人林君季厚及諸士大

夫請曰此鉅役也宜垂後益筆諸碑遂特書而繫之詩
曰

赫赫城隍主司保障祀典有嚴輿情歸嚮福善禍淫執
樞默相不言而化旁乎遠暢廟貌言言式示崇亢門廡
不稱曷為氣象賢侯戾止有作斯倡輪奐鼎新神居益
壯祀事孔時錫我嘉貺歲有常稔人告無恙報施罔輟
功用益狀左賢右忠並峙郡望尚祐來者無俾多讓

宋贈僕射陳公脩墓碑

皇帝即位之初制詔郡縣脩塞厯代名臣墳墓莆介閩南多先正遺迹惟時守令趣辨目前閭是事不問禮部又用武庫郎中楊琚言行憲臣督之既五年而福建按察副使盱江何公廷秀僉事姑孰鍾公德卿先後行部至莆故宋大中大夫行右諫議大夫充集賢院學士守祕書監致仕上柱國潁川郡開國伯食邑九百戶賜紫金魚袋特贈尚書左僕射陳公諱靖十三世孫淮兩上書言僕射父贈吏部尚書仁璧公墓在南力里壺山僕

射墓在安樂里新塘皆久不治而二祖行能在信史功
澤在莆民淮誠不忍顧力薄願乞如明詔時淮年高深
衣大帶動止古雅又行義足以動人二公至與為賓主
禮即下郡令縣令佐脩二名臣墓成化八年冬迄工如
儀淮曰是惟朝廷天地之德羣公父母之心與吾祖宗
之烈在敢一日忘諸於是謀樹碑刻述以告其鄉生韶
曰其為我銘之噫吾莆唐宋諸名臣故隴荆棘多矣陳
氏再世獨得今日者淮為之後也蓋其尊翁廷傑先生

力學好古舉儒官有名永樂間淮文學行義實世之二
家父父子子夫夫婦婦縉紳諸族視之有愧色嘗遊太
學當得官不肯冒年苟就去不顧獨尊祖念宗無時釋
口純孝出於天性然也何鍾二公以風節自任故於淮
有合銘曰

古稱七閩莆屬于泉陳氏居閩來自潁川由閩而徙清
遠令始為莆右姓世多受祉子仕開平天雄巡屬間關
嶺表以啟芳躅是生尚書洪進從事開寶啟運勸之內

附帝用錫命檢校膳部歸錄海隅兵革不試奪田淤海
以開溝洫民其賴之允世無極贈典有加官僚之秩權
領冢司維以勸德僕射肩之允文且武起身縣尉公不
之恥靖寇蘇民特復公里甫始建軍實以公言遜宅為
治功孰與肩改薄陽翟薦有位序司戶叅軍仍來于許
大宗興國適有遼師制勝五策能結主知遷丞將作以
監利國知無不為言論鑿鑿糊名易書考校維公世以
為式塲屋是宗乃理庶慎乃使于夷何天之寵章服是

宜民事屢陳簡在帝心轉運江南嗣爾德音沿納無藝
民亦勞止論罷太甚庶其甦矣勸農奏議手自編摩經
國有集用藏于家啟封備服勲階並進秘書歸田不相
其命爰自筮仕二十四遷為名法從沒世稱賢熙寧嗣
君有嘉臣軌執其遺書贈之左揆循吏特書人所慕顧
苗裔猶宥而况公墓高岸為谷忽罹不測皇帝勸忠制
詔脩塞憲臣司牧奔走將事士民興嘆忠孝何負生死
蒙休罔間多故玄室堂堂彌增高厚曷以致之惟公有

後

陳康懿公尚書神道碑

公諱俊字時英別號愚庵世居莆之後隸早負才志穎敏不凡少長與故御史黃仲淵行人林時深叅政黃廷永同遊學俱有重名于時稱東廂為多賢公為時文精深雅健詞明理備行輩皆師事之正統丁卯以書經舉鄉試第一明年戊辰登進士第又明年授戶部主事父珪為廣東文昌縣教諭卒于官公渡海迎喪海南富土

物公私以事至者涉險是懲類捆載而歸公一無所取
上下嗟異服喪家居未嘗干澤郡縣服闋仍除舊職景
泰甲戌差督天津等衛舊欠秋青草公上言官兵原採
取之額已難徵辦况歲增耶漁不可以竭澤朝議是之
得減增數三十五萬束滿歲歸江南蘇松諸郡負上供
銀七十餘萬兩公受委往督不數月告完部長貳奇其
才俾典閩部章奏終其官天順三年遷員外郎四年春
同考禮部會試尋轉郎中五年兩廣合兵討叛蠻英廟

命公往督餽餉假重權以行公便宜擇吏分方趣辦得無乏是冬遭母夫人喪乞守制不允次年蠻下兵解始奔喪回監軍總戎合百金為賻却之成化紀元復任郎中於其部未幾陞南京太常寺少卿時郎官久無拜卿少者公以賢譽始得之搢紳榮焉然皆惜其閑散知非久居也四年召為戶部右侍郎公於戶部號素鍊至是邊事動四方日奏災傷公佐揚尚書鼎隨時裁決懸合事宜部屬相謂諸文移稿有陳公筆如嵌金然其重之

如此五年持節充正使冊封荆王七年京師饑奉詔平糴太倉米百萬斛以利民公慮奸黠乘勢射利乃奏請石以下許糴多者閉不與百年虜聚河套規內侵憲廟命將征之勅公總督軍餉于陝西公請出內帑銀助邊且除徑道發丁飛輓勞勩集事無間寒暑是役也榆林大捷公偕諸將凱還加食從二品俸九年改吏部時退傳尹公為冢宰文莊葉公為左侍郎公與之同德一心前後銓叙寔稱得人十年文莊沒公代之十三年滿九

載拜南京戶部尚書又越二十二年復滿九載赴闕請
老不允賞賚羊酒寶鈔俾還任與子天叙入冑監公既
還再以老疾辭遂加太子少保致仕賜璽書馳傳還鄉
仍命有司月給米二石輿隸四人逾年以疾卒弘治元
年二月二十九日也距生永樂己亥享年七十計聞今
上復加卹典賜謚康懿遣官諭祭且營葬于湯亭山考
教諭府君與祖明善皆以公貴累贈南京兵部尚書祖
妣黃氏妣鄭氏俱累贈夫人配夫人馬氏先公十年卒

側室林氏某氏子男二長即天叙娶方林出次天秩尚
幼某出女四長適黃曾次適潘麟餘未行嗚呼公為人沉
毅簡重孝友廉慎實終身之行故哀榮特異云方公之
歸也莆人聚觀所在如堵予憶陳正獻公事寄賀以詩
有曰郡樓紫氣銷沉久喜見清風太宰歸蓋莆之人物
在宋惟乾淳為盛時則有若正簡莊敏文節以及二劉
諸公布列在位然其名德莫過於正獻後三百年至我
朝成化間復盛材賢林立然其望實亦莫過康懿史言

陳相孝友忠敬清嚴好禮平居恂恂如不能言今觀公
大較然也然陳相居天子左右公留南都十餘年故言
論風烈彰微不同時則爾矣天叙以予知公請銘神道
之碑乃序其大者銘之其他榮遇世系有墓誌在銘曰
宋有正獻作相阜陵福履名德為莆首稱三百餘禩寥
寥莫繼迨我憲皇時有康懿惟康懿公人所讓賢于思
而揚望之偉然方初筮仕不家于喪慎若處子禮以自
防卒減芻蕘閱其勞止氓負南金往亟稽理寬嚴適宜

綽有賢譽主典章奏冗務何預乃考會闡乃督軍興嶺
南行營戎功告成爰自郎署擢貳奉常召佐司徒遭時
勸勸平糶賑飢其均惟則奸欺不生人乃食德虜入西
鄙命將徂征督餉給邊公又在行師飽戰力諸將奏凱
公加泉俸移官少宰三賢同德為國光華銓叙公明帝
用汝嘉乃擢南都長彼民部載更司馬以贊留務天官
上卿終而獻績乞骸不允榮荷三錫公曰予年懇請弗
違城邑聚觀如天人歸璽書寵貺宮保進秩廩粟繼繼

興徒翼翼云胡不靳及期考終皇情悼惻卹典優隆勒
詞堅珉焯德耀功何以擬之企古福公

葉氏先塋碑

昔元制用人分南北南人率不得至宰輔凡華族無有
公相繼顯率多官州縣浮沉以止若異代名勝之後尤
為所外上不以貴下不以來往往中絕弗聞者矣金華
葉氏宋阜陵時諱衡者為宰相其裔遭寇難家族流散
譜牒失亡雖有居其故鄉而世系無傳莫之考信有約

庵先生者金華府城北四隅人仕元為九江路判官後
隱迹不復出事業生卒之詳於今無能言者故老相傳
先生未仕時讀書於城北智者庵歸隱後卜築於城西
芙蓉峯下居焉遺址尚存謙恭厚德時目為長者子顥
字景南克承家學以時多故不復仕性甘淡泊善吟咏
所著有樵雲獨唱集傳于世年八十四而卒與約庵俱
葬芙蓉峯之麓配張氏生士廉字子高亦能詩家存錢
稿國朝洪武初從軍淮安遂占籍為山陽縣人年八十

二卒贈戶部左侍郎配淑人黃氏卒八十自此遂葬于
淮上數世俱單傳子高始生三子長諱雍字邦和行厚
一年八十九卒累贈戶部左侍郎三子仲曰詳字本道
行榮七號頤庵累封台州府知府季曰淇字本清行榮
十今為戶部尚書知府二子長曰贊字崇禮今為四川
左叅政次曰寶字從善冠帶義民尚書之子曰貢國子
生未仕而卒一子本廕叙國子生尚書先宦遊江廣屢
至金華展謁見約庵樵雲二世故隴依然而歲時麥飯

不得親洒一盃欲分房徙居之迄今事奪不果則嘆曰
路判公去吾五世生平事迹已無知者年更遼邈吾恐
衣冠之藏將忘其處況他乎哉於是伐石為碑樹於峰
下間請刻辭予聞韓魏公先世居鎮定後徙安陽忠獻
既貴乃推尋祖墳得而表之今觀尚書公之刻石先塋
正猶忠獻之用心也宜銘以示來世銘曰

惟宋婺墟宰執相望衡相阜陵子葉有光季世多難宗
散譜亡有元約庵崛起故鄉郡判自致恥祖汾陽樵雲

繼之隱德弗彰世學善鳴於詩其昌胡耕不獲胡弛不
張亞卿載徙淮土戎行乃子乃孫乃冠乃裳尚書叅政
疊桂聯芳顧瞻先塋各天一方孰綿蕝之以限牛羊穹
碑爰樹于彼道傍過者必式視此銘章

白塘李氏重修先祠碑銘

惟李氏世家為莆之望辨族姓者謂唐宗室江王後遭
武氏難淪落泉南五季板蕩諱言系閩至宋錄其裔格
授泉州助教再世轉入莆微弗史見其顯而可徵者自

承信郎諱富公始嘗從大將韓蘄王有功辟殿前統制
司幹辦公事事母孝樂施與創修橋梁至數十人食其
德居白水塘東墩至今呼為制幹家蓋功行完具不待
稽諸清門自足為世世不斬之祖矣三子次廷耀為惠
州僉判又徙居西墩六子長次若如皆登科第重輝襲
芳震耀一時以後支屬屢薦鄉書若之子暨孫又割已
產以為圭田而西墩之宗祀益盛厯元世五世孫讌老
號西塘者實生五子而伯仲叔文森文善文材尤克家

業乃益昌爰定祠墓祭規以垂于後孟季二房不有焉
入國朝書澤如故宦績不絕然大槩皆西塘後也永樂
間僉判故第廳事惟于鬱攸子孫各隨小宗世數祀私
親於室而統祀制幹諸先祖歲時權寓他所而已正統
丁巳西塘四世孫德文為族長乃即廳事故址構祠堂
廣三丈六尺深四丈有奇中設大龕合祀上世神主其
於儀制草創未備至天順甲申嗣族長德懷又構前廳
為祭畢燕飲之所中為大門外有簷廊石砌甬道拾級而

上其合祀仍舊成化二年歲在丙戌故族長孟殷賢而
好禮始以義起徹中龕甃石為臺廣丈有二尺深三之
一墜為五龕中祀制幹僉判諸祖中左祀割田有功願
齋父子以其年邈不嗣故專祀之中右并左右三龕則
祀文森三昆仲以下神主人自為龕蓋出四親之上於
家有再興之勞故世祀之若四親之祀則各仍私室茲
堂不以入也又沿故規定祭物俾三房子孫迭取蒸嘗
年租以供具若上墓若諱日若冬年俗節皆有祭因以

燕朔望則叅謁惟謹故家遺俗蓋彬彬矣先是孟殷之
羣從純體廣雖拔儒科未大發泄自後不數年五人連
得雋元鎮登進士第今為廣東按察司僉事長源文獻
為學諭偕伯通有嘉四人者行將會試春官其他待舉
難一二數長源乃孟殷之孫暨有嘉皆文善後元鎮則
則文森後伯通文獻又文材後也上距制幹公凡十二
世矣憲臣行部式其間為樹進士坊於祠南道中其南
舊有欄牆橫窓下瞰白水塘加潤色焉風致曠遠殆與

此祠相為悠久僉事與長源謀曰先祠改觀惟乃祖是
賴不有碑刻何以示後人知今日也而以屬予嘗聞之
禮有不一而情無窮為人後者不知其祖則已知之而
能忽然乎昔者程子嘗祀始先祖矣紫陽夫子本之著
於家禮後疑其不安而止我太祖洪武初許士庶祭曾
祖考永樂年脩性理大全書又頒家禮於天下則遠祖
之祀亦通制也然設位無專祠今莆諸名族多有之而
世次龕位家自為度或分五室左右祀高曾以下或雖

分五室子孫左右序房各祀其高曾以下而皆以中室
祀先祖或按禮分四親各室以西為上而先祖止祭於
墓所人反疑之議禮老儒迄無定論誠以人之至情有
不能已不能一焉今白水塘之祠上祀十有餘世揆諸
禮意似非所宜然族屬之衆且踈舍是不舉則人心渙
散無所維繫欲保宗祀於不墜綿世澤於無窮豈不難
哉嗚呼是祠之闢與其重矣乎嗣修後人尚其鑒諸銘
曰

天潢肇迹經于異域懷山沃日莫知其極胡可蟲以測
承信有赫忠孝維則興梁畢力民懷其德斯君子之澤
自東而分于彼西墩科第萃門僉判後昆肆厥家有聞
高堂言言垂三百年守懈弗虔鬱攸是延其爾後之愆
孰往不復是營是度祠祀攸作以合宴酌惟執事有恪
來格洋洋降爾百祥甲乙聯芳文物益揚更千百年勿
替厥常

來鶴樓合祠碑銘

姑蘇來鶴樓在鶴山書院內初蜀魏文靖公為宋名儒
登宰執後家平江元世立書院祠之置學官弟子員肄
業其中國朝例罷生徒而書院猶存文靖公神主在焉
永樂以來凡遣大臣行視水利巡撫地方皆居院以治
事屢加修葺宣德正統間巡撫尚書周文襄公往來居
之最久將稀年時又到之日適其誕辰有雙鶴來翔
于庭眾咸異之既去蘇守朱勝為建來鶴樓於是院正
堂之後遷置神主於上未幾公致仕歸而沒今三十餘

年矣東南人念公功德不置多立私祠間寓僧寺獨蘇城無之況公之功于蘇尤大安可無也蓋公二十年間總核荒蕪田糧創立水次倉庾囤戶田甲義役傳馬官俸折徵餘米存積凡糧運加減之則濟農飲散之宜種種便民者俱自公權輿而於蘇始焉至於清理范氏義田經畫崇明塗蕩濬吳淞顧浦一帶水利建寶帶吳江等處橋堤太鎮衛學之肇造吳縣儒宮之改遷似此之屬又皆於蘇傳焉奈之何僅肖像學舍而不他有也書

院雖為鶴山而設來鶴則為公建文靖公固可專祠文
襄公亦可合祠也蓋文靖公之道學可法於後世而文
襄公之事功最感於吳中合祠於蘇不亦宜乎成化甲
辰秋予忝巡撫是邦處於書院瞻拜文靖公神主於樓
中而環視樓下石刻皆頌美文襄公事然無其主意前
人謂來鶴為公而樓足以顯名於無窮惡用主為噫此非
所以敬賢尚功之禮且無以慰邦人之思也越明年夏詢
知公功之詳於是令太守李廷美造公神主擇日奉置


于樓與文靖公並偶予赴召未能成禮遂俾守卒事又
繫辭於碑曰

惟宋之季邛實有儒道德問學與西山俱叅樞開督蒞
其毀譽乃卷而懷卒家於吳爰暨似續顯揚是苗元乞
立學比迹鵝湖師生濟濟以景賢模我朝更制冗泛其
祛依神之木尚仍于初鶴山有堂制使來居文襄戾止
視民卒瘁晨夕在念如切肌膚公資明敏公性勤劬晝
堂晝訪粉盤夜書待旦行之子惠我蘇荒疇招佃免爾

負逋米石加耗五六平輸石四准直二十四銖料簡賦
長無俾侵漁審權校量互收調區一孔一目不漏不疏
里甲十季差次運夫還復而均貧富樂趨鱗鱗水次倉
積山如京運漕兌贈加有餘乃置濟農以備不虞驛傳
有給義役有須織造上供歲派軍需胥此焉出別無科
敷公簡義衛經造閭閻問民疾苦甌石何儲發廩賑之
野無饑莩海縣流沙淤為蕩塗經畫分授抵補冊租贍
族義田先正之模載清傳付俾後畢哺乃遷吳學或勅

或郭省元倫魁接武天衢吳淞顧浦泄彼太湖乃濬乃
鑿民免其魚寶帶湖堤歲久崎嶇乃甃乃築人走坦途
二十餘年恩布仁舒非無凶歲我有儲胥非無祈寒我
有袴襦軍民足給遠邇歡娛間有煩言久而益孚雙鶴
翔庭適公懸弧僉曰異哉茲其瑞乎眉壽之徵進祿之
符鼎建來鶴樓于北隅公歸在朝首拜司徒辭掌邦土
惟帝曰都南圻再撫敢忘捐軀臣年及矣幸賜懸車胡
歸三載弔者在廬吳人思公至今不渝窮鄉尸祝會城

盡無瞻彼鶴山來鶴相於德業雖異會歸不殊百世之
下兩其師諸



彭惠安集卷五